

# Introducciun

Autor(en): **Vieli, R.**

Objekttyp: **Preface**

Zeitschrift: **Igl Ischi : organ della Romania (Societat de Students Romontschs)**

Band (Jahr): **21 (1928)**

PDF erstellt am: **20.07.2024**

## **Nutzungsbedingungen**

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

## **Haftungsausschluss**

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.



## Introducziun.

---

La radunonza annuala della Romania dils 12 de settember 1926 a Bonaduz ha confidau a nus la redacziun digl Ischi. Nus havein acceptau cun tschaffen giuvenil quest honorific incaric, cartend de saver cheutras survir al pievel romontsch ed a siu lungatg.

Avon in onn ei la davosa annada digl Ischi, redigida da nies meriteivel redactur, sgr. prof. Dr. P. Tuor, comparida. Ed oz ei igl Ischi gia puspei pinaus de far siu viadi atras la tiara romontscha. Nus savein buca schar far viadi «nossa emprema annada» senza porscher a nos lecturs ina cuorta introducziun.

Dr. C. Decurtins, confundatur della Romania e meriteivel empren redactur de nies organ, ha dau agl Ischi il ver spert e la dretga tempra scientifica populara. Tgi che legia sias contribuziuns egl Ischi, inspiradas da profunda carezia per il lungatg romontsch, quel sa er oz buca resister alla forza perschuasiva e stimulonta de sia viarva. Ses plaid: «Quei che nos giuvens amitgs contan ussa, vegn ad anflar in echo tier ils affons dils affons e quels che neschan dad els», ein daventai realitad.

Las contribuziuns, che Dr. C. Decurtins ha mintgamai scret per igl Ischi, sco era siu comiau ell' otgavla annada, ein il custeivel testament spirital, ch' el ha fatg alla Romania. Sco siu successur,

sgr. prof. Dr. Tuor, vegnin era nus a restar fideivels al spert ed als principis, als quals Decurtins ha dau aschi viva e decidida expressiun. Che siu spert meini nus, ei igl emprem giavisch della nova redacziun.

Schegie ch'igl ei cheu buca il liug per apprezzar duidamein quei che siu vengonz successur, sgr. prof. Dr. P. Tuor, ha prestau duront dus decennis sco redactor digl Ischi e promotur della caussa romontscha, eis ei tuttina gest e dueivel de seregurdar, schebi mo alla cuorta, de ses merets.

Denton ha Dr. Tuor buca mo redigiu igl Ischi, el ha era contribuiu in bi diember lavurs de gronda valeta scientifica e linguistica-nazionala. Il spazi lubescha a nus buc d'enumerar sias biaras ed excellentas lavurs historic-giuridicas, ses programatics artechels dedicai al lungatg ed alla litteratura romontscha. Sias contribuziuns representan denton ina gronda lavur ed ein per nus, cun las nunveseivlas lavurs redaczionalas, sufficient motiv per esser engrazieivels. Cun questa caschun menzionein nus in tierz meret. Dr. P. Tuor ha dau agl Ischi nova veta ed alla Romania niev impuls e promoviu senza relasch il moviment romontsch, che tila oz sco in'aria frestgentonta atras nossas valladas grischunas. Cun nos sentiments de renconuschientscha semischeidan denton negins sentiments de displascher e de petradad, pertgei nies preziau redactor cass digl Ischi ha buca priu comiau da nus. Anzi, el compara danovamein en «nossa emprema annada» cun ina beinvegnida contribuziun davart il Centenari dils libers de Laax. Engraziand per tut sia lavur egl Ischi e sias stentas e breigias per la Romania ed en favur dil Romontsch en general, exprimn nus il secund giavisch: che sgr. prof. Dr. P. Tuor resti fideivels a

siu Ischi e che siu exempel de premurada e sacrificonta lavur enflommi ad in enflammar la giuventetgna romontscha.

Ella novavla annada digl Ischi scriva Dr. Tuor: «En las otg annadas, comparidas sut sia redacziun, ha Dr. Decurtins dau a nies organ quella tempra, la quala nus savessen buca midar senza untgir dals principis, che han scaffiu nossa Romania.» Oz suenter vegn onns, turnein nus a scriver, fagend ina pintga midada: En las vegn annadas, comparidas sut lur redacziun, han Dr. Decurtins e Dr. Tuor dau a nies organ quella tempra, la quala nus savessen buca midar senza untgir dals principis, che han scaffiu nossa Romania. Fideivels als principis de nos predecessurs, elegin era nus il motto: *Vinavon per la medema strada.*

Igl emprem intent de nies organ ei mantener e cultivar nies car lungatg mumma. En medem temps dei igl Ischi svegliar tier ils Romontschs ina profunda carezia per la patria grischuna. La carezia unida cul spert de sacrificontadad ei il meglier rempar encunter l'influenza jastra, che smanatscha l'existenza dil romontsch. Per contonscher l'indicada finamira vegn igl Ischi a purtar era dacheudenvi lavurs belletristicas sco tractats de character scientific en fuorma populara.

La belletristica compeglia lavurs en prosa e poesia. Ella dei esser in maletg verdeivel della veta de nies pievel puril muntagnard. La natira, l'istoria, sco era il temps present porschan agl egl allert material detgadiravunda per teisser ina teila grischuna. Poesias, cumedias, novellas, raquintaziuns, descripziuns, skizzas en cuntegn e spert romontschas deian divertir ed en medem temps instruir nies pievel romontsch. Purschend ina sauna lectura, sperein nus de far enconuschent a nies

## VIII

pievel las bellezias ed atgnadads de nies lungatg, e d' impedir che nosa glied legi rauba jastra.

Las lavurs scientificas tracteschien objectivamein ed en fuorma plascheivla l' historia linguistica, litterara, culturala e politica dil pievel romontsch grischun. Nossa pli gronda atenziun vulessen nus denton dedicar a damondas linguisticas-culturalas. Il lungatg e la cultura, il plaid e la caussa merentan daveras nosa pli gronda atenziun, pertgei els ein nos pli custeivels beins, ch' ein smanatschai en lur existenza. Buca mo nies lungatg ei periclitau, mobein era nosa cultura. Nossas veglias isonzas, nossas instituziuns, nos indrezs, nies viver e sevestgir etc etc semidan en in contin e crodan adina pli e pli en emblidanza. Sche nus savein forsa era buca retener il cuors dil mund e las grondas midadas economicas de nies temps, sche vulein nus silmeins conservar egl Ischi l' ierta de nos perdavons. Sco Emanuel Friedli ha representau en 8 voluminus toms la cultura ed il dialect bernes, aschia vulessen era nus descriver il lungatg, la cultura, la veta dil pievel grischun romontsch.

Nus supplichein perquei nos stimai collaboraturs e tuts quels che savessen esser tals, de studegiar, observar e descriver oravontut nies pievel, tut siu far e demanar, sias stentas e breigias, sias uras de legria sco era sias uras de tristezia, sinaquei che nies Ischi daventi adina pli in spiegel della cultura e dil lungatg dil pievel romontsch. Sche nos giavischs serealiseschan, ei igl Ischi tut semplamein il cudisch della patria grischuna. Exprimend quest tierz giavisch surdein nus nosa emprema annada digl Ischi al car pievel romontsch.

Cuera, ils 20 de settember 1928.

*R. Vieli.*